

興國州志卷之二十二

孝友

宋

黃遵性至孝精繪事所得值悉易甘旨以奉母慶歷中嘗感疾卒
凡三日而蘇曰適見紫衣金帶者謂汝母壽尙有十年矜爾孝
可歸終養遂取筆註其籍越十年母終服除遍辭親識而卒湖

廣通志

明

吳國典字型可任楚府典儀生母馮早世事父及繼母汪盡子道

興國州志

卷二十二 孝友

一

繼母舉兩弟撫教成立以腴產予之家素封勇於爲善凡修城
隄繕祠宇賑饑掩骼捐貲不下數萬金

石榴字汝茂下豐樂里人四歲孤事母賈氏竭力承歡子炬官工
部郎中

徐應招字縉岑諸生父患痿痺扶持四載父沒竭力養母有弟性
傲而酗於酒屢戒不悛或曰盍訟之官招泣曰我不能友而弟
是校可謂孝乎弟卒感悟

石麟禎字公迪廩生炬長子育於嫡母余氏順治乙酉闖賊渡江
掠州境禎偕弟輩奉嫡母避之土塘賊擁至執母索金禎匍匐

請曰幸縱母與若金賊釋母責如約禎僞爲解囊者度母去遠
因謂曰予貧士安所得金前爲老母故誑爾賊大怒將刃之弟
麟文麟武次子惟岳相繼前爭死賊並殺之母獲全禎爲人謙
退慈仁而卒以孝死族鄙哀之

吳康字惟穆事繼母譚氏以孝聞幼弟譚出也撫之成立

譚宏襟父母年登八旬宏襟承顏適志孺慕不衰父母同歿號泣
七日不食卒後旌

劉漢宗黃州人徙居興國以孝稱父歿廬墓三年

劉永灝懷仁里人明義官事母孝依依膝下雖甚寒暑不少易母

興國州志

卷二十二 孝友

二

沒哀毀廬墓三年

華春第諸生居父母喪寢苦枕塊廬墓三年

據採訪冊增入

莊侍字克闇興教里人事父母色養備至侍父疾匕藥必親葬祭
用家禮久之芝生墓上人以爲孝徵歲祲道遇餓者歸謀諸婦
脫簪珥爲粥往食之所活人終不令之知也子以善歲貢有父

風 據吳明卿集增入

國朝

劉洪性字秉善興教里人明末避流賊於江西瑞昌之瓜山促伯
季先而躬負母行賊猝至錯愕失措少頃雷電交作賊退得免

入咸歎爲孝感入 國朝補州學生員

李之昱字爾臣三歲喪父母王氏守節撫之家故貧昱見母艱苦狀輒涕泣比長勉力井臼不以衣食憂母崇禎甲戌母病旦夕哭泣祈北斗願以身代叩頭流血母果愈嘗夜半比舍災母已寢熟昱急負母走母甞不省人語臥不肯起火及戶昱窘解綿衣漬池水納牖中身自蔽母火頓滅昱四十尙無子有鄰翁程姓者夢神告曰之昱何患無子其楣上金字額孝可回天卽其子數也康熙甲戌以孝聞於官官贈以額與夢符人皆異之後生子四應熙翰林庶吉士次應顏應顛應頌雍正二年以母節

興國州志

卷二十二 孝友

三

子孝同日受 旌

柯清瀛字仙聚六歲孤稍長母語以父生平梗概輒泣奉母孝嘗以事至漢口忽心悸亟歸抵家母果寢疾聞通山有名醫往迎之值山水泛漲舟楫不通瀛號泣適有竹筏浮至遂得渡詣醫家請夜行途遇二虎瀛叱之虎搖尾去人嘆爲孝感有里長被竊將鬻妻子以償官瀛得其狀慨然代償里皆義之子時懋進士

潘曰化字楚琳下豐樂里人幼失怙刻木奉祀母疾延醫道遇虎泣告虎退康熙癸卯大水一日城中火人多奔水中化雇船數

十拯之得生者無算壽九十子命臣孝亦如父孫道閔諸生舊
志列壽考今改入

石震先字惕亭崇仁里人母患疾不能動履震先偕妻侍奉七年
弗怠醫言鰻魚可治風時方嚴寒破冰取之母食之果愈表姪
幼孤撫養成立家僅中人產而於修學宮建州署皆勉力捐助
孫燦光龍光庠生舊志列隱逸今改入

方倚中字依儒長慶里人三歲時隨母送族人葬且喜且哭母問
故對曰兒喜有母又恐似若之無母也既長依依左右不肯赴
省應試父患沉疴禱於神而愈母病哽與妻日夕侍榻前母不

興國州志

卷二十二 孝友

四

食亦不食母沒哀毀廬墓三年有盜過其門相戒曰此方孝子
家也犯之不祥嘗捐貲修大瑤畝港石橋行人便之孫立經舉
人歷官直隸正定府知府

王大興字近可嘗就學城中聞父病覓醫夜行水逆舟緩大興仰
天呼號忽得風瞬行八十里泊岸約四更馳至大凌湖有虎踞
道大哭虎卽去抵家僅得永訣居喪號慟氣絕復甦後事祖及
母俱能致其孝子隆啓早食餼

李正伯蘄州人崇禎十年獻賊掠江北舉家南避遇賊殺其兄弟
復執其父母正伯哀號乞以身代賊刺之傷其左臂傍一賊叱

曰此孝子也殺之不祥舍之夜夢神以藥塗傷處創遂合事雙親色養終身善醫活人不取值年八十三卒

廖必達字良芝甫成童卽念家貧親老棄儒業醫以給親膳偶出必刻期歸省遇闖賊冒死衛親刃傷其臂母唐氏疾篤刺血和藥以進且屬妻曾氏斷兒乳以乳母疾愈復祈壽武當九華諸名山或以孝題贈卻之曰吾豈以親沽名耶子二廷楨諸生廷相明經

鮑珣字容若諸生未冠隨父就學永豐縣幕半載父患痢垢污必親浣及沒哀毀骨立扶柩歸過鄱陽狂風暴發舟多覆珣撫棺

興國州志

卷二十二 孝友

五

哀號得無恙人謂孝感妻潘氏事孀姑王亦以孝聞子名儒舉武科媳王氏敬事舅姑姑偶跌折足左右扶持過勞致疾卒盧以調字燮臣三歲失恃事繼母以孝聞父光廩生應康熙壬子鄉試以病沒闈中調奔至一慟幾絕後逢試期竟日悲號遂終身不應試

陳遇讚字綸客愚子增貢生候選縣丞隨父任之蜀父疾叩天求代父卒哀毀踰禮扶柩歸越險數千里及母沒朝夕哭泣友愛庶弟自襁褓至成立無間子明揚孫良松俱以孝聞

盧以劭字克念高次子年十七列郡庠旋食廩生母李嘗持齊遂

侍母茹素卅餘年母沒廬墓異母兄弟四人俱先卒劬事諸母不異所生劬子斯爲孝亦如父父沒廬墓後遭疾臨終屬其子曰必葬我於父之墓側庶相依如生前也斯爲庠生雍正壬子與修州志

陳國祥福慶里人五歲失恃每私哭於野恐傷父心也事繼母鄒氏無異生母鄒寢疾祥日侍榻前衣衾垢穢必自浣滌叔某謂祥盍令人代祥曰母疾久矣慮有惡臭假人手或生憎其曲盡孝道如此

楊以權字天衡上陽新里人博學父沒廬墓攀柏悲號柏爲之枯

興國州志

卷二十二 孝友

六

妻陳氏爲姑吮癰姑病篤叩天求代嘗糞味甘悲慟幾絕乾隆三年聞於官題請建雙孝坊 旌之子貫百諸生

潘良瑚字濟美善事親土賊執其母索財物瑚冒刃號救受四傷不肯退賊感而釋之嘗出粟賑饑拾金不昧施寒衣棺木無算年登九十鄉里稱之子士明孫四俱庠生

陳華國字質生諸生值闖賊亂奉親匿山中流離之際甘旨不缺居喪哀毀廬墓子遇瑛歲貢孫夢麟庠生

謝廷聖字五常事親孝羣盜夜掠其家冒刃衛親得無恙子文通曾孫家誥元孫聲亮俱舉人

舊志列隱逸今改入

潘良德字帝錫親喪廬墓三載壽九十四五世同堂子士英舉人
舊志列壽考今改入

姜應申字自天樂歲里人幼喪父母刻木爲像朝夕奉祀里中呼
爲丁孝子親所遺產悉讓於兄以授徒爲業人有鬻子者捐館
金贖之壽九十四子隆福庠生
舊志列壽考今改入

劉洪翼字秉翰廩生事親孝親疾衣不解帶父沒廬墓見有妻子
離異者傾貲保全道拾遺金俟其人還之子晉元進士
舊志列
隱逸今改入

李南狩諸生避流寇與妻薛氏茹苦而奉母必甘旨人咸稱之

興國州志

卷二十二 孝友

七

瞿之佐年十四入泮嗣母賈氏患沉疴之佐侍湯藥臥不解帶者
數月婦陳氏孝亦如之子祖元孫士琪俱諸生

石其掄字銓掌康熙丙子武榜孝事嫡母母患痺痿數年扶持不
少懈忽長瘤蝨出無數其掄取吞之蝨遂止兩次當補官皆以
母老不就子泰臨諸生

曹職撫字則后永城里人歷事三母奉養無異撫幼弟成立州侯
黃題額褒之子立春舉人

侯樹慈字倫若家居授徒多所成就事父母竭盡心力父沒廬墓
三年子光裕舉人

張士達字非聞庠生父疾醫藥罔驗刺血和丸以進禱北斗願以身代妻孫氏奉湯藥浣垢穢歷三年無倦士達嘗過石屋雷雨猝至避樹下樹幾折恍惚中若有移之者得無恙子文燦援例歲貢

李之章字漢上諸生幼失恃善事繼母雖厲色以待孝敬不衰妻劉氏亦能曲意承歡父所遺產悉委諸弟

明良棟福慶里人年十七母徐氏臥病侍湯藥閱五月不歸私寢疾劇嘗糞知不可爲乃齋沐告天乞以身代未幾母沒哀毀幾滅性

興國州志

卷二十二 孝友

八

江啓躍幼喪父孝事母母多疾日夕寢興榻前無敢離病劇醫辭不治躍曰人言嘗糞可測生死遂嘗之悲越日復嘗乃喜自是母病漸瘥後母卒哀毀骨立喪葬如禮

潘士經字敘典諸生事父能得歡心父病久筋骨痠疼士經爪膚分痛不離左右居母喪恐傷父心每潛哭他所及父沒慟絕復蘇者再

張令典字二書父早卒事母先意承志產業悉以讓兄舌耕自給以理學教生徒一時英達多出其門

舊志列隱逸今改入

柯瑞璋少孤事母備致孝養慟父早世布衣疏食終其身母卒年

九十瑞璋已七十居喪不以衰老廢禮兩弟生計窘屢分潤之
子隆焜庠生 舊志列義士今改入

易光大字天若諸生早失怙恃事繼母色養不衰友愛諸弟分居
日把臂涕泣田宅讓弟多取子四俱庠生

石大有字能謙九歲孤事母能色養母疾偕妻朝夕奉湯藥六閱
月弗懈疾劇齧指瀝血書禱於神願促己算以延母母夢神語
云鑒爾子誠孝延爾壽一紀後果如神語子朝光歲貢

王大驥諸生竭力承歡親老孺慕弗衰兄弟分居田產聽弟自取
人皆以爲難

興國州志

卷二十二 孝友

九

鄧可久五歲失恃父性嚴峻可久能得歡心父沒喪葬盡禮事繼
母談談怒輒偕妻跪闕外怒解始起

鍾音字次三諸生父正光以科試沒於鄂城時音七歲柩至奔迎
入室有沮之者哭曰父生居此豈忍沒不登堂乎撫棺擗踊見
者淚下子仕初髻年入泮事母亦以孝聞

曹立徐諸生七歲喪父執禮如成人越數年母沒晝夜號慟鄰里
爲之罷宴刻像奉祀每食必祭哭盡哀檢故篋得父遺命乃鬻
田產修祖塋凡傍支無後者咸爲立碑

董漢儀字祖舒增生母病經年率妻朝夕奉湯藥衣不解帶弟早

逝訓姪儒先成名捐貲修學宮歲饑減價平糶子飛龍儒教孫
正東俱庠生

石文元字緝五例貢生候選州同事二親皆得歡心母患沉疴調
治三載藥必先嘗子六三遊庠乾隆間題請建坊

程先立諸生少孤長力學舌耕以養母值母怒跪請鞭撻怒解始
起母患鼻癰以口吮之居母喪廬於柩側一夕大風雷懼損母

柩跪泣達旦聞者惻然

舊志作通山人

劉光暹字仲升庠生興教里人居父母喪葬祭盡禮廬墓三年思
慕弗衰妻瞿氏亦盡孝道子二俱入泮

興國州志

卷二十二 孝友

十

蕭世樸幼失恃父鰥居廿餘年伴寢視食不離左右父病稽首北
斗求以身代及沒廬墓三年朝夕悲號兄亡遺孤在襁裸視若
己出撫之成立

萬邦憲字階遠諸生素篤孺慕父病累月朝夕侍側藥餌先嘗夜
則虔禱於天旋瘳

成其功字蟾客父邁危疾其功年十六多方調治衣不解帶者三
月禱天求代父果瘳子自天庠生

以上舊志

陳思楫字作舟歸化里人父涇川嘉慶庚辰以他姓事累禁府獄

楫傷之謂其妻余氏曰予將以身代父脫獄解予亦得歸矣如不歸汝其終吾事乎妻泣而諾之子熙和甫九月乳抱在懷顧之悽然淚下至省請於官父得歸楫竟卒於獄氏聞大慟又恐傷翁心陽爲慰藉奉養十餘年翁卒曰吾今日乃得終夫事也子長教之成立

徐近隆近盛慈口里人兄弟力作養母母年七十且瞽比舍災隆盛適在田倉皇奔歸火已及戶不見母遂冒火入火燔鄰人往視一抱母首一伏母身俱斃而母屍無焦傷聞者莫不哀之

徐時浚字修之尊賢坊人父以事成廣東越二年往省至則父已

興國州志

卷二十二 孝友

十一

逃勾牒下矣伺撫軍出遮輿請代數被笞尋染瘴瀕危泣曰死不足惜若吾父何病少間復泣訴撫軍爲動容曰爾父已逃爾將誰代顧左右給以錢蓋資之歸也及歸則父已先至旣而母沒結廬墓側旦則歸營父膳夜則往宿墓所雖大風雨無間未幾卒一子復天州人士爲立姪孫以嗣並釀錢四十緡其族中亦助二十緡買地爲祭產歲取所入以飲其家云

易光辰字雲衢尊賢坊人事父母備致孝養母性畏雷及沒光辰廬墓側遇大雷必號其母使無怖兄弟謀析居弗能禁憫季弟幼攜與同處受室後始均分其產焉子肇標事繼母洪曲盡孝

道洪稍不懌輒跪謝解顏始起母疾劇夜延醫倉皇失路忽一燈熒然照行數十里醫至投劑母果瘳母沒忌日必哭以祭之
余允湘尊賢坊人家貧少失怙事母孝母沒廬墓墓距城十餘里日則小貿城市夜則歸宿墓所歷三年如一日一夕大風甚雨中途燭滅忽有燈光導至墓前遂不見道光丙戌年 旌

鄭鳳鳴監生上陽新里人數歲喪母卽知悲慟事父及繼母曲意承歡父遘痢疾治鮮效嘗糞以驗輕重母病久動履需人鳳鳴負之出入復患癰舐之而愈父初貿於蜀及歸家中落意多不適每怒鳳鳴和顏受之晚年傭貿以備甘旨妻子凍餒不遑恤

興國州志

卷二十二 孝友

十二

也

易京班尊賢坊人傭汲養親自啖糠覈而羞膳必豐母沒寢苦枕塊茹素三年道光間 旌

董興麟少喪母擗踊哭泣如成人事繼母趙若所生母發疽吮之而愈因染毒卒嘉慶七年 旌

湖北通志

彭菲安樂里人親疾侍榻前三年沒居廬六年先後不入內寢凡九年每食必祭忌日則哭慟兄早世言之輒流涕妻熊氏亦能孝養子諧律庠生道光十七年 旌

王家紙少孤貧傭工養母旦出必告歸卽問安否遇主人設食必

舍肉以遺母主人感其孝命之食而別以餽之

趙珩字象儀監生永城里人榮密子平居孝養父病市藥省垣夜渡保安湖舟覆獨獲甦侍母疾適粵匪至被脅珩以母病哀訴賊釋之前後居喪廬墓山中六年一夕有劫賊過廬見其慘戚狀去之山下有湖朝夕往來舟子不取其值固與之亦弗受其孝之感人如此

從先惟宣化里人四歲而孤事母甚謹家貧拮据適鋤禾得一瓦器啓視有錢六千喜曰此天賜以供吾母也母沒廬墓有虎經墓側視眈眈惟叱曰爾何爲者虎徑去自是家人戒勿往惟

興國州志

卷二十二 孝友

十三

不聽

阮譽邦吉口里人侍父疾寢食俱廢每夕祝天求代父卒哀毀致疾母沒廬墓年餘疾增劇歸家十數日而卒初季弟病譽邦襍被眠弟側調護倍至數月不歸私寢

秦輔春庠生尊賢坊人事父母甚謹母久疾禱北斗而愈母卒廬墓三年

石白元尊賢坊人家不中貲而養親必豐腆母患風痺率妻董氏服事惟謹三年不懈居喪一遵古禮不入內寢不用浮屠里黨欽之舉鄉飲介賔道光甲辰同旌

汪有清豐葉里人咸豐辛酉夏粵匪掠境執其母索金有清請以身代因執有清去行里許遂大罵賊賊殺之旋有畜犬奔庭中作嚎訢狀家人隨往得屍妻陳氏痛夫慘死欲以身殉姑止之遂矢志終身

劉立運立連立遴長慶里人咸豐辛酉粵匪入境運兄弟負母逃賊猝至三人以身衛母走賊復追併力與搏不勝俱遇害黃給諫元善奏 旌准入忠義祠建坊

余繼明字理齋尊賢坊歲貢生八齡而孤授徒家塾定省無曠自題其居曰依依壽母之堂邑名士胡興遐爲之跋子元禮廩生

興國州志

卷二十二 孝友

十四

樊永江福慶里人咸豐辛酉粵匪至母闕氏卧病江不忍去賊曳之出連刃之氏驚氣絕江奔跪牀前而死賊退族人歸視江猶端跪如生

王朝柱樂平里人孝事雙親親沒茹蔬廬墓

成玉丹諸生下雙遷里人與妻劉氏善事繼母有子婦雙孝之目道光間 旌子和珍副榜官巴東教諭

鄢子遴尊賢坊人事繼母克孝妻陳氏亦以孝稱乾隆五年題請建坊

馮德遺永城里人力農養母母沒廬墓三年見母遺物卽涕泣除

夕必攜臥具宿墓側終其身不易

曹啓賢字雲南監生永城里人嗣父沒孝事嗣母母晚年患風痺寢食起居躬親扶持歷三年如一日家素貧及稍豐爲生父置祭產恩待兄弟歲饑餼族人粟子正龍從龍庠生

曹文發字徐揚永城里人養親必具甘旨温席扇枕終身弗懈親沒廬墓

馮國賜字貢予永城里人父患哽母患嗽賜侍疾衣不解帶者恆數月親沒每逢生忌日必泣祭友愛幼弟時濟其乏子三迓衡歲貢孫三倪桂心庠生

興國州志

卷二十二 孝友

十五

石之綸字經大樂歲里人家甚貧事繼母王氏竭力供養終母百有二歲不衰

石增達字君上樂歲里人母沒哀毀廬墓三年

程文洛永章里人居居養親定省如禮講學於鄉頑獷者多爲所化

張鵬搏字霄白諸生豐義里人親沒廬墓三年戀戀不忍去旣歸猶時望墓哀號元孫逢時諸生

劉朝律崇慶里人少孤事母孝母沒廬墓三年

柯瑞蕃興瑞里人父先沒偕弟瑞昌力農養母母性嚴每怒兄弟

各率妻跪請罪怒解始起朝夕問視不以農忙廢出耕耒耜必爭負秋冬報賽宴會恆相讓一室怡怡鄉里稱羨

柯隆訓興瑞里人生有至性母中風四年隆訓服事惟謹耕穫歸必先扶母起母食然後食嘗夜聞母呼急趨之跌傷手足不使母知母沒哀毀盡禮

石漢相永福里人母患癱瘓舉動需人漢相扶持歷九寒暑不懈弟早沒撫孤姪逾於己子年九十八卒

闕榮監生修善里人年十三父患臀癱含洩吮之父沒廬墓事母極得歡心母沒哀如喪父忌日誕辰號泣終日

興國州志

卷二十二 孝友

十六

明師烜修善里人母臥病四年朝夕調護未嘗暫離嘗爲母禱武當山千里徒步不憚也

柯進松興瑞里人傭工養母母患毒六年每夕必歸洗瘡敷藥親任其事母沒哀慕甚篤凡母所縫衣履悉珍藏之每出曝則涕泣終日

柯益涵興瑞里人少孤貧力耕養母自食草蔬而甘旨無缺侍母疾衣不解帶母亡終日如孺子泣身沒無子族人庠生長齡爲捐田立嗣以承其祀

朱新書字聽濤諸生下豐樂里人早矢恃事父惟謹父疾累月調

湯藥澣衣衾必身親之父母忌日雖老必齋戒以祭沒年八十
一子清格孫崇實俱庠生

陳以莊福慶里人繼母病嘗糞以驗增減每糶谷遵母命不槩其
斛

王廷簡上雙遷里人居母喪茹蔬廬墓三年如一日妻舒氏亦以
孝稱

阮愚堂字天才吉口里人生母早卒哀毀骨立三事繼母皆如所
生母患痺愚堂左右調治負之出入歷九年不懈孫榮森俊俱
遊於庠

興國州志

卷二十二 孝友

十七

李克純字元吉事親能色養父母沒哀毀逾禮每值忌辰終日涕
泣

譚世感善福里人販笠營生躬嗽藜藿奉母必豐三十餘年如一
日母沒哀毀廬墓三年

張世忠字兼恕豐義里人祖患風痺忠念父衰昕夕代扶持悉當
祖意衣衾穢污必親滌除閱七年無間事父母亦極意承歡子
龍翔廩生

陳公其仁義里人嗣於叔嗣母性卞急虐使之公其順受母患病
食常需肉日采樵易肉以養時有虎出爲害公其卒未嘗遇人

以爲孝感

成德學仁義里人嗣母陳氏以節著德學事之曲得歡心母疾朝夕扶持垢穢皆親滌

馬發雄辛安里人事親孝謹自茹草蔬而厚於奉親親沒廬墓數年忌日涕泣不食

蕭仕緬字琴堂修淨里人父沒養母昕夕不離左右咸豐辛酉粵匪竄境仕緬年近七旬患足疾欲負母逃力不逮惟依母涕泣賊覩其狀不忍傷而去

秦厚泰長慶里人父患病伏枕六年厚泰左右就養不遺餘力咸興國州志

卷二十二 孝友

十八

豐辛酉賊掠其家罵賊而死胡文忠公咨獎
方鎰元孝事母母年高多病朝夕侍側飲食必親調歷三十六年弗懈

王武茂宣化里人母沒廬墓三年

石光瑞字祥玉下豐樂里人事親能色養夏扇枕席冬則以身溫被親稍有不懌率子弟等長跪請罪意解方起從弟光珽字犀霞孝亦如之

李燦興永章里人事母孝一日隨兄耕於野有虎攫其兄而鎔焉興持農器直前奮擊中虎要害虎委兄去興負歸兄傷肘醫云

口嚼蝓蟻敷患處可治興如其法兄卒愈

魯象雅永福里人長兄寢疾親嘗湯藥晝夜籲天求代兄疾果瘳
蕭榮馨字正平修淨里人候選從九品性孝色養父母二十餘年
無少懈居喪哀祭盡禮嘗于闔闔中拾遺金立待其人反之鄉
里有泛駕子弟輒訓導使就規矩居恒研究經義言笑不苟著
有孝弟故事對語二卷經紳耆舉孝廉方正因格于例未果
費光樞字懷金善福里人監生少孤事母孝嘗課徒村塾旦暮必
歸省遇大風雨阻輒望閭號泣母歿哀毀逾常數日勺飲不入
口廬墓終喪哀經垢敝不去身族鄙稱之

興國州志

卷二十二 孝友

十九

柯鳳起字點吾從九銜訓蒙供養有嘉肴瓜果必懷遺母偶歸輒
依依膝下不忍去年六十餘懼母憂其體衰以紅繩束髮作兒
戲以娛母人謂有老萊子風母歿盡哀盡禮卒年七十八

劉用杰字秀南崇仁里人品端學粹與妻石氏侍湯藥衣不解帶
者數月母卒哭泣三年淚繼以血目幾眇柴骨慘黯人不忍見
子燮烺孝友世篤赤明經孫中漢凌漢諸生

鄭光文上陽辛監生懋遷貲財一無所私生平曲體親志親歿哀
毀柴立忌日祭泣如孺子終其身子子黃諸生

徐 鼎字品珍慈口里人父母歿廬墓終制

孝友 增補

明

劉宗哲字大泉性豁達仗義輕財散粟濟荒善則歸親精堪輿得吉兆呼兄弟擇而取友愛摯誼人所不及

劉守教字克寬興教里人州學生嘉靖甲午選貢投四川成都司訓調江西東鄉板輿迎養久之母思鄉歸守教累牘乞養當道惜其才不許居無何夜半心動晨起已報轉職中州矣便道馳歸不十日而母終蓋孝感也後補河南徽王府教授

國朝

興國州志

卷二十二 孝友

二十

鄧明珠字華璧永福里人家貧竭力事親年三十餘失偶慮再娶虐其子而遺母憂遂不娶母性嚴或怒不與語常繞膝呼累百十聲母顏爲解每具饌母命無過豐明珠曰母存不以羞母百歲後能嘗兒一臠乎母喪哀毀逾恆年八十八卒

劉光迪字仲謝例貢生興教里人居父喪年甫十二哀戚如禮弔者動容事兄克盡其恭性好施人有稱貸必給其求族女桂姑適柯貧而寡光迪憐之撫養以終其節他如脩石橋捐祭器動費數百金無少吝云

劉正之字文端興教里人幼穎悟年十二應童試有聲冠庠試優

等性孝友家居侍養先意承歡親歿哀毀骨立孺慕之思老而彌篤與兄益椀傳經弟鳴盛怡怡聚處論文講道衰齡無間好施與歲荒輒捐穀倡賑里黨德之他如修橋施藥恤寡字孤諸善舉無不隨時樂助處世謙和雖拂意事不與人較嘗輯敬信錄刊送子烱煥均二品封孫鳳綸庶常知縣鳳玉陝西知府人咸稱積善之報云

陳立湜字曉泉興教里人性孝友悅親順親曲盡其誠兄弟析產推多取少怡怡然數十年如一日治家嚴明有法好解推陰行善不令人知歲荒輒捐穀賑鄰全活甚衆接人和煦終身無疾

興國州志

卷二十二 孝友

二十一

言遽色子四長光亨號秋門以編修任臺諫寄書勸以忠孝格言秋門彙集成帙燬於兵士林惜之次復亨國學三咸亨舉人四裕亨廩貢諸孫膠庠迭起方興未艾云

鄒國茆字魯典樂歲里舉人屢薦春闈不售隱居授徒脩金所入輒分與弟孝友式於宗黨著有松竹山房文稿

劉萬全字純玉朝陽里人事親孝道光壬午水大漲全救父棺隻身赴水以殉

費達意字慶先安樂里人四齡失怙稍長母患足疾扶持溫清歷三十餘載人無間言

伍東有安樂里人性至孝色笑無違親歿廬墓

孫友江字朝海東鄉里人性至孝祖母病篤江剗股療愈祖母嘆曰世言久病無孝子吾竟有孝孫矣母病侍湯藥年餘不少離母卒哀毀骨立里人稱無間言

王國隆字傅舟上遷里人親喪廬墓哀毀居常目不邪視湛深經術著有祀說古今名臣論蛾子文集待梓

王義玉上遷里人性素孝貧鰥外貿江右德安縣遂迎母氏養焉同治七年秋鄰火沿燒其家時玉外出聞之急奔歸冒火入門遍尋母不見疑已出因出詢外人復入負母出踰時死其母後

興國州志

卷二十二 孝友

二十二

七日亦死鄰人哀之合葬焉立孝子碑於墓今改扞故土

梁道鋒字明德樂歲里人父喪廬墓三年形容枯瘁見者憐之嘗以膏腴田一斗五升捐義學族人止之曰爾產幾何何爲此卒不聽予之後窮約自甘

石中白字圭三樂歲里人進士長甲之祖也親歿廬墓三年與兄中書俱精易理

柯求仲興教里人性孝母歿廬墓三年

鄧能謙下陽辛里人早失怙事母以孝母歿寢苦枕塊水漿不入族人再三勸進飲食始蘇後廬墓終制

秦志麟字孔瑞下豐樂里人庠生父病劇焚香乞以身代父母歿
哀毀骨立盡禮三年

趙思定下豐樂里人早孤傭工養母晨昏必歸省母病嘗糞驗母
歿毀瘠骨立

李冠斗職員尊賢坊人事母至孝母患瀉疾十餘年穢污皆親滌
須臾不離左右母歿哀毀骨立歲時致祭痛泣如嬰兒終身一
日

成達萬仁義里人秉性肫摯事繼母二俱以孝聞侍疾恒累月衣
不解帶母歿廬墓三年

興國州志

卷二十二 孝友

二十三

陳清第號袖峯崇慶里人監生少孤事母孝母歿廬墓六年

陳慶平崇慶里人其兄操舟業載商鹽遇風浪土匪奪之商以盜
賣鳴于官平痛兄冤代訴不得直死于獄鄉人哀之

馮可興永城里人兄弟析居獨養繼母母病澣衣供食必躬親無
稍懈一夕歸遇虎泣曰母病在牀如傷余何人侍奉虎竟顧而
去論者以爲孝心所感云

李春榮永城里人事親孝定省無少懈家雖貧甘旨未嘗不備

鄭宗熹上陽辛人親歿廬墓三年

阮承域吉口里人庠生同治庚午 恩賜副榜少孤力學事母

孝長館家塾晚必歸省遠地聘雖重修不就母病侍湯藥不解帶者累月母歿廬墓三載平居好讀書不預外事接人以和而持躬耿介著有自箴十則暨附光集待梓紳耆等稟舉孝廉方正未詳卒

袁世銳字利用吉口里人事母至孝母歿廬墓三年

全家洪字錦川吉口里人操農業以菽水得親歡母歿恐傷父心恒私哭于野父歿墓廬距家六里許地僻少人烟三載不飲酒不如葷人謂其孝出自性真云

石德金辛安里人家貧力農侍父疾九年溺污皆自浣濯父足軟

興國州志

卷二十二 孝友

二十四

負以出入依之左右歿尤哀毀逾恒歲時致祭輒號泣至痛終身如一日

石建烜字亘軒稟性肫摯母疾篤刲肱和羹以進疾旋愈隱居教授著述甚多雅不願以文名士林重之

鄧漢藻字偉石幼以順親爲心父疾彌留囑以奮志芸窗喪畢留心鄴架越數年遊於庠事母先意承歡偶遭小疾慮母憂強起以解之此殆古之所謂養志者歟歿年二十二

孝友 又增

李大咸字帝音豐葉里人繼母熊患疫疾臥不起者四年咸侍湯藥服事維謹母歿廬墓山有虎跡咸出入不怖亦卒無害嘗買雷姓爲奴知爲獨子焚券遺之 舊志

陳明揚字樸菴諸生侍父疾衣不解帶居喪哀毀勺飲不入口者五日母明泣曰父亡弟幼兒若死吾何依乃起啜粥事母竭力承歡撫孤姪如己出郡侯黃獎庠序領袖額 舊志

方依儒辛安里人父應明患沈疴儒晝夜禱神疾竟瘳壽至八十母陳患哽儒依依榻前母不食亦不食母歿以哀毀死生平好

興國州志

卷二十二 孝友

二十五

施捐修石橋行旅稱便子定韓廩生孫立經舉人 舊志

袁秉鈞字調陽監生承秦子性孝友十齡時母馮患病劇父以其痘也戒勿近鈞趨跪榻前以頭觸地流血遍體及長與諸弟敦勉力學肄業江漢書院主講王公汝驤器其文七試鄉闈不售

賚志以歿 舊志

吳續大孝事繼母母疾刲股以療從兄貧乏分產以給邑南襟湖行人病涉釀金築堤往來便之

陳湄字在之治策子諸生肄業大學名噪六堂援例就職州司馬爲人慷慨多略隨父宦遊服勞備至與弟沆文詩切劘數十年

怡怡無間里有爭輒解囊寢之卒之日遠近嗟嘆流涕著有顏麓山房遺稿子元幹元霖孫煥利寅均諸生

易肇杞字芝廬尊賢坊人監生乾隆間督修黌宮家居孝友年逾八旬怡怡不衰人爭羨之曾孫俊刑部員外郎

張曜辰字登甲豐義里人族有糾伐祖墓喬木力阻不聽曜辰情意遽以刃割腹明其誠衆遂却封樹得全孫逢時諸生

鄭凌雲上陽辛人舌耕供養未嘗遠離母病凌雲衣不解帶親滌械踰侍養股勞始終無間孫依周舉人

劉烜字慧夫正之子優行諸生肄業江漢鹿洞兩書院學益進屢

興國州志

卷二十二 孝友

二十六

薦不售侍庭闈色養備至與弟煥有無與共怡怡無間強仕逾艾丁親憂哀如孺子咸豐間辦團有聲伏莽起畏而繞道追擊潰之事聞獎敘爲人外剛內慈面折入過人自不恨兵燹後家不中貲見貧苦必設法以周施膏丹歲以爲常族苦儼祭累爲定均戶章累除子鳳綸散館改外迎養鉛山烜令裁陋規減騎從禁傳詞去非刑災增賑課增獎孤貧增額事事以勤慎愛人爲勗在鉛五載鳳綸告養歸里後年餘卒齡七十有九著有居官居家格言醫學藝學易知錄行世

柯舒齋下遷里人事嗣父奉養服勞親滌溺器父病痢不解帶者

月餘憫而却之舒齋佯退而隱伺一夕如廁失步遽趨前扶持其委曲承奉如此每於牀前說古今可喜可愕之事以悅聽又嘗焚香禱天求益父算及卒哭祭盡哀偶見手澤悲不自勝與人和易貸貧乏無少吝子占春孫坤俱庠生

胡射斗字觀國中豐樂武舉孝性純篤父遘痢疾射斗承糞嘗之泣曰醫云味甘不治今甘矣可奈何居喪哀毀適粵匪至家人驚散射斗撫棺悲號賊感而去當侍疾時射斗妻董氏割股和藥伉儷孝聲里閭共式子裕甲武生

陳聖拱性友愛弟產中落拱分財以贍歲時伏臘對飲爲歡弟歿興國州志

卷二十二 孝友

二十七

爲之殮葬必厚必慎遇佳節感觸欷歔教養諸姪成立年八十六以壽終

朱清格下豐樂增生父患風痺格侍湯藥數年不少離咸豐甲寅粵匪至朱村衆皆驚散格獨留賊欲加刃見其左右扶持情詞懇至感而釋之子崇實諸生

阮輝堂字石泉吉口里監生性至孝母患頭疾老益甚輝堂侍湯藥不少離飲食梳洗躬爲服勞如是者十餘年善醫不受值孜孜診視惟恐不瘳負不能償者焚其券卒之日遠近莫不流涕有哭踊於道者子孫均膺封職曾孫躋仕版列膠庠者濟濟人

謂仁孝之報云

黃用霖字義菴善福里增生學宗程朱誘掖後進性和而介不少
媿姍兵燹後創立里規不逞之徒敬憚斂迹敦內行孝養父母
孺慕不衰弟析箸十餘年家漸落復與合爨以課讀脩金爲弟
理婚嫁營室置產晚更怡怡昕宵共處有姜被之風云

曹蔀字梧峰歲貢事親唯諾惟謹與弟介蜂怡愉若師友持己恭
而待人恕授徒講學門下多知名士著有葦蕪堂時文

鄧月蜃字蟾光永福里人母鄒年老多疾夜則以身溫被晝則負
之以行每外出必稟母不答不敢出母歿哀毀柴立人稱孝焉

興國州志

卷二十二 孝友

二十八

胡玉珂長樂里人性至孝奉養承歡數十年依依膝下有老萊風
兄弟友于甚篤翁和之氣溢於門庭人爭羨之

陳日新字石嶺湄子性至孝事母黃宜人定省扶持依依膝下宜
人年高每欲窺園躬負以行宜人曰吾兒孝能如吾意願爾後
嗣孝亦如兒曰新勤樸公正克恭天顯爲人解紛人多德之子
利寅諸生

明大倫修善里人性至孝髫齡失恃父病延醫嘗糞劑藥夜則號
泣禱天求以身代病遂愈兄疾親煎藥餌有然鬚風先後居喪
廬墓六年著有守墓詩錄

余鳳舉字燦文尊賢坊人力學敦品養親先意承志旨甘將缺潛
寘度閣如宿物蓋恐親知而惜費不安也讀書城南風雨必歸
省終其身塵懷明發彌留之際泣稱不孝者再生平好施每外
出必橐錢以給貧者嘗雪夜聞行乞聲卽披衣起而飲食之其
誠心周濟如此子青選歲貢丹選廩生孫宗起廩生宗裕庠生
陳大猷下豐樂監生侍祖父病衣不解帶旋患便結醫治莫效訪
有吹蜜穀道方大猷不避穢污如方時時呼吸之疾頓瘳

華美江字源清父耀彩好施予雖窘乏必貸以承志每大雨令江
蓑笠護橋未嘗却避母賈病劇除夕走數十里禱太平山寺刺

興國州志

卷二十二 孝友

二十九

臂血酹酒跪而待旦挈神前水歸和藥進病愈父病誓以終身
茹素禱病亦愈江農人至性如此可以風矣

熊夢飛字伯川樂歲里諸生幼侍祖庭卽知溫清及長膂力過人
先衆搏虎有卞莊風遇術士以符兵擊人人皆辟易夢飛試之
術者應手踣妖僧固不勝傅公也父病禱神渡值風濤竟無恙
疾亦瘳逾十年又病醫云糞苦方治夢飛嘗而甘悲不自勝居
喪水漿不入口者累日廬墓終制奉母色養曲盡子職族黨有
以不孝首卽痛繩之貸不能償者焚其券途遇病診方施藥無
論識不識也自壽句云浪得虛名傳藉藉恐叢實過詈申申因

號疏慵散人可知其志矣子冠斗刑部主事

朱正來下遷里人家貧力作養親母臥病十餘年扶持調護不少
離一日偶出暴雨溪漲正來臨流涕泣忽有老人指涉處得歸
後循其迹者仍不得涉咸驚爲孝感云

柯道慨字介節興瑞里人性誠樸居平好談忠孝事居父母喪先
後廬墓六年不入內室服闋每晚焚香拜墓風雨無間終其身
朱德發辛安里人母柯老而多病德發侍湯藥扶持無懈柯歿廬
墓三年墓旁多虎跡德發不懼亦無害也人謂孝感

桂光維興教里人家貧力田以養自食藜藿奉母必市甘旨先意

興國州志

卷二十二 孝友

三十

承順怡聲下氣母偶不樂則歌以娛之孝出至誠人言無間

柯隆顯興瑞里人性至孝奉養必具甘旨溫清之勤數十年不懈
親歿廬墓三年

柯愈槐興瑞里人謹愿好學繼母遇之苛時加鞭楚槐引過自責
歡侍如恒有薛孟嘗遺風年三十歿里鄰哀之

彭以德安樂里人性至孝力農養親承歡無間親歿廬墓隆冬酷
暑不少離哭泣三年哀容無改爲人鯁直樸誠兄弟友于恩誼
甚篤人稱長者

蕭功恢修淨里人事母孝一日偶出鄰舍火起焚其門恢至冒火

入室負母而出額焦襦袴俱然母竟無恙人謂祝融鑒其孝云
柯照明興瑞里人幼有至性母病父外出取藏錢市甘旨及珍藥
父歸索受責不言既娶奉盥調羹承歡孝養兄苦債照出匳金
以償皆冲齡所難能者乃甫逾弱冠竟以瘵死可憫也

朱容札字緘書慈口里人廬墓六載年逾周甲孺慕不衰鄰里共
稱其孝

舒文國字鑑藻中豐樂諸生性孝母患癱瘓文國侍湯藥躬滌中
冪外姑張貧而瞽迎養以終人義之弟淮歿助貲治喪撫姪以
恩俾孀弟婦趙得遂柏舟之志歲歉則市穀賑飢粵匪至憂憤

興國州志

卷二十二 孝友

三十一

成疾而卒子桂林諸生清倫守備

石山毅性至孝親歿哀毀柴立既葬廬墓泣血七晝夜不食聞者
哀之劉孝廉漢杰爲之傳

柯鴻翥字傳書東鄉里諸生事繼母劉曲意承歡有妹劉出也嫁
而壻故殉焉遺一孤鴻翥撫字教誨如己出遠近賢之

劉仁懋字壽安興教里人節母杜老而患痺筋攣骨疼艱於步履
仁懋左右扶持或負以行七年如一日可謂能用勞矣

柯進邦東鄉里人性至孝力農供養每外出必稟母起居飲食侍
奉無懈弟七人通有無敦式好樸誠煦嫗足式浮澆

割股孝行

石才儒字大成割股療父

吳良招割股療親

何希國割股療伯父

黃仲濟割股療繼母

俞國柱割股療繼母

吳康侯割股療親

以上舊志

徐廷均下豐樂里人嗣父性嚴少不如意撻之流血廷均每順受母疾割右股療之父疾割左股療之

石孝亨宣化里人割肝療父父歿廬墓後修墓力負畚鍤創裂嘔血卒妻李氏亦割股療翁

興國州志

卷二十二 孝友

三十二

朱樸久仁義里人四歲失恃事繼母能色歲饑自啖甘藜藿而供母必豐母疾割股療之

王文乙福慶里人割股療母晚年乞丐孝養不衰

王文丁福慶里人割股療繼母文丁卒父中風妻尹氏日夜侍側扶持調治

邢尙城監生豐葉里人割股療嫡母父歿廬墓三年

柯進楠興瑞里人孝事父母嗣父母病割股療之

柯進宇興瑞里人事父孝兩次割股療繼母

程自修永章里人割股療母母歿廬墓

王定瑚字夏日豐義里人割股療祖父瑚孫鼎福亦割股療祖母
瑚之孝有以先之也

程應竒永章里人繼母病篤割股和藥以進病遂痊知州靳公獎
純孝格天額

談逢基上遷里人祖母王氏病篤焚香祝天割肝和羹以進病頓
瘳知州李公獎純孝可風額

黃道腹善福里人割股療母時年十五

黃彝良善福里人嚙股療母時年十七

汪秋元長樂里人父病焚香籲禱割股和藥病遂瘳

興國州志

卷二十二 孝友

三十三

陳彥禮長慶里割股療母知州陸公獎摯性彌綸額

萬金亭豐葉里人本身父病割股和羹以進病遂瘳

李聖有豐葉里人割股療繼母

董兆登宣化里人割股療嗣母母歿廬墓三年

董允光宣化里人割股療父

黃象茂善福里人割股療母

黃象旦善福里人割股療父

汪德英長樂里人割股療嗣母

王泰諸生樂平里人割股療生母

趙以默永城里人割股療嗣母

王朝棟樂平里人割股療母

石智瑞宣化里人割股療繼母

陳興文仁義里人割股療嗣父

陳柏臺仁義里人割股療母

董兆銀割股療嗣父

秦瀚洋下豐樂里人割股療繼母

劉繼煌豐義里人割股療叔

歐陽趙明崇仁里人割股療母

興國州志

卷二十二 孝友

三十四

董恩深豐葉里人割股療繼母

鄒守黃福慶里人割股療嫡母

柯誠益興瑞里人割股療母

沈觀本修善里人割股療母

費緯光寶政里人割股療母

張繼發修淨里人割股療父

張繼有修淨里人割股療父

邱良洪豐葉里人割股療母

陳開榜辛安里人割股療母

陳周爰字芳谷崇慶里人監生割股療父

李明時字中聖寶政里人性至孝割股療母

張繼平寶政里人性至孝母患喉痛割股療之立愈

汪憲文長樂里人母疾割股和羹以進卽愈

趙克默字識之永城里人割股療母

曹用圭字秀三永城里人監生割股療嗣母

王春生上遷里人庠生母病割股和羹以進遂瘳

劉中鐸福慶里人平居事節母以孝聞年十九遇粵逆之難母被

賊逼溺殮後自經以殉

興國州志

卷二十二 孝友

三十五

劉懋沾興教里人割股療母

劉嗣芬興教里人割股療嗣母

萬永秋割股療父

李善衍割股療母

義行

元

張文忠字甫相歸化里人性耿介身長一丈二尺腰十圍技勇絕人元末立鯽魚寨保護鄉里至正十三年總管秦文郁舉爲永興簿明太祖戰陳友諒於康山文忠率衆轉餉助軍進秩大夫明

潘政甫下豐樂里人洪武五年大侵輸粟千石助賑勅賜冠帶建尙義坊旌之孫則禮復於正統五年出粟千石救荒亦受旌

徐貴美慈口里人正統七年大饑出穀一千三百石助賑勅旌義

興國州志

卷二十二 義行

三十六

民工部侍郎綱武功知縣化其曾孫也

楊昭陽新里人諸生正統七年出穀一千三百石助賑勅建義門坊旌之孫儒魯官僉事

石翮下豐樂里人慕張公藝同居之風立祠堂刊家範置義田並濟鄰里之貧不能存者又捐百金修儒學同居六世子鉞舉人潘赤字正南新亭里人歲稔捐賑有司旌之孫師道官布政使

潘銑字國振赤子與兄弟同財作孝弟忠信禮義廉耻八訓垂示

子孫師道其子也

舊志列隱逸今改入

劉福堯字晴峯興教里人萬厯間呈請上憲於肇陳地方立興瑞

里定吳楚之界清戶口之冊興民得免賠累瑞民亦息鬪爭有
功於丁糧甚大

陳天祐萬厯己丑歲饑捐穀千石助賑更爲粥以食老稚之就食
者又捐千金修大成殿啓聖祠明倫堂州牧馬公深嘉之
周士燦諸生設謀勦風火尖茅坪寨土寇兼守城有功巡撫何公
義之後以選貢授廣濟縣訓導

陳王庭廩生流賊入境偕知州何鳴鑾守城出謀破賊城賴以安
國朝

劉興觀興教里歲貢明季族人因亂逃散出田三百畝招之耕種

興國州志

卷二十二 義行

三十七

宗族始獲還定安集焉

陳仲謀字望宇永福里人順治三年大兵過境捐豆助餉子愚
舉人

馮大燠字煜公宣化里人有勇力明末流寇至境燠提戈殺賊賊
不敢近家素豐亂離中嘗解囊濟急遷城市火逼其宅燠下拜
風反火滅年九十七五代同堂

舊志列壽考今改入

柯師襄字仲鐸順治間鄉民謀亂極力開導族有好勇疾貧者收
養於家以固其心一時奸宄爲之感化子成商孫景涵俱諸生
余應蛟兄弟俱諸生順治四年大疫九年大旱施藥施賑多所全

活捐修學宮改建 啟聖祠蛟與夔及從弟鵬爲之倡夔子二士旂廩生士久歲貢

阮承封好義舉明末土寇肆暴上書軍門用其策而渠魁授首里有因貧鬻妻者助資保全年九十三卒孫鳴世諸生

趙遠伯長慶里人積而能散己丑歲祲里中質田乞糶者踵至慨然分給並焚其券妻鄧氏子傑俱能同志以成義舉

賈純肖豐義里人順治九年歲歉出粟以賑活人甚多

柳文上字子達待宗族周其困乏造就諸子弟康熙癸酉歲饑賑穀百石多所全活

舊志列隱逸今改入

興國州志

卷二十二 義行

三十八

劉兆元順治十八年歲祲捐米八十石爲粥以食餓者康熙二年冬州城火元有積穀二百石得無恙因分以濟被災之家康熙二十七年督標兵夏逢龍作亂城鄉震恐倡義安輯並助軍餉有友人被誣出百金以解其事子三俱庠生孫炎副榜

張繼啟字瑞卿下樂平里人康熙初年勦西山逋寇檄下興國徵夫運糧里甲猝不能辦啟集弟姪充夫三十一名星夜前往以

爲倡州牧獎爲義民

按西山逋寇蓋流賊餘黨李來亨等竄伏鄖襄山中康熙三年官軍討平之

盧定超字遠脫豐葉里諸生康熙六年歲祲出穀貸人不能償者皆不索值嘗以銀一百三十兩買陳人產復代賠餉三十金陳

後貧遂還其產平生所行多類此孫秉鈞武舉

王德尙字公遠上雙遷里人康熙丙子舉武科少失恃事父及繼母曲意承歡好讀書多大略明季流寇之亂雙遷蹂躪尤甚農民逃散田畝荒蕪迨入國朝逋賦歲積德尙倡顛上官豁免以招徠之由是流亡復業二十二年歲稔賑穀五百石一方賴以保全里故有先賢吳仲庶龍圖書院後廢爲寺兵火後德尙復之以爲後學肄業地孫大興諸生

伍聰俊康熙十年大旱出穀賑飢鄉人賴之壽九十八子亮諸生孫福歲貢開國諸生

舊志列壽考今訂入

興國州志

卷二十二 義行

三十九

袁允權康熙十年大飢捐穀二百石全活甚多壽登九十二

舊志列壽

考今訂入

柯才興瑞里人嘗爲陳人贖身撫族子之孤成立康熙二十七年督標兵夏逢龍因裁兵激變屬邑震恐才糾衆保城年八十二卒子次桓歲貢

華其仕陽新里人早失怙恃事兄維謹田廬聽其自取遇歲歉減價出糶不足則買米以繼貧不能葬者助之里有佳子弟資以膏火使力於學子世禧世祉俱諸生

李之良字夢賚諸生康熙三十二年大飢捐粟助賑族有鬻子者

代贖歸卒之日里黨無不流涕妻曹氏能體夫志捐田建茶亭
於汪左舖至今猶存子二應明舉人應庚諸生舊志列隱逸今訂人
潘學惠上豐樂里人家僅中人產而性好施濟康熙三十二年大
飢勉力助賑隣有鬻子者傾囊以贖州牧張公贈以一鄉善士
之額孫士相歲貢

呂士通諸生周貧恤孤施棺修路皆傾囊不吝康熙三十二年大
旱減價糶穀千餘石子興懷廩生

伍慶選諸生康熙三十二年大旱捐穀分濟里黨稱頌子聰光舉
人

興國州志

卷二十二 義行

四十

鄒京望明末兵燹 學宮傾頽巡道李公廉其慷慨好義委之董
修

程文煒字方直諸生饒於貲康熙四十三年有江西難民流離州
境助之歸里修學繕城首捐弗吝孫英銘進士曾孫才濂舉人
黃心望字定昌康熙三十四年暮自外歸道拾一囊晨往候之有
人匍匐來泣曰我陽新里長餉迫囊金一百一十三兩遺此不
獲惟有投監死耳必望出金還之州牧張公表其閭

柯祥景字慶五候選縣丞兄弟析居時田廬聽弟姪自取康熙四
十七年穀價昂起景往湖南糶穀八百餘石減價以糶其貸不

能償者亦不索也竹林橋爲吳楚通衢捐金修之子鳳諸生董漢賢字又舒由諸生援例爲縣丞性篤孝好義樂施里有長者之稱旣沒妻石氏體夫志周恤貧乏雍正三年舉行社倉捐穀百石

石廓然字有容好義輕財妻董氏相助推解建涼亭於浮屠街捐田施茶雍正三年舉行社倉首捐穀百石爲諸里倡卒之日傭丐望門垂涕

劉世甲崇慶里請生幼喪父事母撫弟以孝友聞康熙十年大旱出穀以賑族鄰州牧王公置義塚甲捐貲瘞枯骨數十棺

興國州志

卷二十二 義行

四十一

王正爲力學篤行永福里尹爾黃虧欠糧餉當是爲里長變產得百金

遺於湖畔爲拾之坐以待旦爾黃哭至盡還之子家屏有父風里人楊某賣牛得假銀父及繼母詬責交加計窮投水遇家屏引至家爲易銀而遣之孫大騏舉人

王維藩居排市有過客投宿遺白金五十餘兩藩驚曰此必某客所遺也因持金追至州則客已誣他人將訟之官矣藩大呼曰若所遺在此受誣者叩頭謝某客欲分金酬之不顧而去

明家傳字敬菴監生少孤奉母訓維謹祖遺房產悉委之從兄弟族有不能嫁娶者極力資助周恤鄰里終身弗懈子如漢有父

風

程極天字豈下輕財好施五建橋梁四設茶亭值官建社倉捐穀百石並捐貲修學宮州署子宜惠能承父志

蔡良益字公從捐貲修荻田橋州牧高公過之歎曰此義舉也公從獨能任之耶又修官橋泥港橋下港橋朝天隄仰山涼亭年逾八十樂善不倦

萬家榮字優寵祖咸安有窖金避寇他適事平命榮往取悉陳於祖分之昆季有逋欠者鬻子來償榮焚券還其金子二長年清武舉次傑諸生

興國州志

卷二十二 義行

四十二

潘學津字聖渡長慶里人好義樂善修學宮州署及常平倉穀俱首捐以爲一州倡子成已援例歲貢

袁同棠字可臣諸生每歲暮分穀以周族黨又修橋梁施棺木皆捐貲不吝妻亦助夫行義子恕諸生

司安國字宗玉諸生好義樂施門枋寨橋廢行人病涉與弟黃玉倡義渡捐田一石二斗地課一兩三錢以爲舟子工食宗玉子裔榮監生黃玉子成諸生分修州志

王大從字用臣修談梁路二十里行人便之鄰有鬻子婦者捐金以贖並多方周之俾得保聚子德瑞建章俱諸生

華其簾字惟菴下雙遷人捐修長泉寶塘二處河岸丙戌秋渡漢江狂風暴作行舟多覆簾大呼能救一人給銀三兩傍舟齊往拯起三人子武備諸生

徐學灝陽新里人遷富池捐山一嶂與人共葬貧無所瘞者德之徐一驤字駕千嘗與徽客洪長卿同舟卿聞父訃急覓他舟歸遺金一百八十餘兩閱四旬卿子至以原封還之歲凶設法周急修塘橋捐百金長子宏諸生早卒媳全氏守節撫孤孫曾多列膠庠

朱靖甫州之東關人城東楊林渡南岸陡峻人苦顛躓靖甫捐百

興國州志

卷二十二 義行

四十三

餘金砌石爲堤長四十丈行人便之

徐可鑪兩拾遺金俱訪其人還之有因債鬻妻者力爲籌資保全鄭聖學上陽辛里人嘗晨起如廁拾銀數錠守候至暮無耗次日其人來尋不獲會大水欲投溺聖學覺而趨救詢驗與之陳京卿光亨爲文紀其事子若蘭庠生孫道和拔貢

柯松若創立義學周恤貧窮施藥施棺樂善不倦子隆仕有父風梁方仕貧而好義見梁公舖上下數十里無茶亭行人病之因建亭捐田施茶

徐咸先歲入田租悉以濟貧乏求貸者必令書券旋毀之其令書

券俾求者有可居之名其毀之者恐無力相償歲久致累也子琮大勇俱諸生

袁永忠少孤力學事母孝嘗捐金瘞骸骨救凍餒年七十有八卒明以善字復園嘗拾遺金百數立待其人還之

舊志列隱逸今改入

胡茂之性好義嘗修官橋及犀牛山等處險路以石砌者三千餘

丈壽登九十三

舊志列壽考今改入

汪必儻字再眉孝友端方濟貧施棺復捐修長慶橋

舊志列隱逸今改入

柯省三里有小河爲吳楚要津省三捐貲砌石爲橋高四仞寬五尺長四十丈三年竣工費以萬計並捐田二畝山一嶂爲修補

興國州志

卷二十二 義行

四十四

資因名裕後橋

鄒魯臣捐修袁家堰荻田橋及白谷橋並加堤頭湖堤土三尺行人稱便

鄧永實嘗捐穀五百石入武昌府積穀倉上憲嘉之

汪興垂捐修十里湖堤並造義渡置田數畝以爲渡子工食嘗拾遺金卽訪其人還之

石允暇諸生性孝友與諸兄析居不較田產腴瘠子堪立舉人

張元卜好義舉邑中椿公堤白米田石坑港皆通衢也俱捐貲修石橋行人稱便

陳善伯嘗拾遺金三十兩卽訪其人還之

阮具名捐修石橋數次約費二千餘金又嘗捐田施茶捐松山一嶂以濟族人壽九十卒

易肇樹貢生乾隆乙巳年大飢捐穀助賑樂善好施至老不倦年九十四卒

陳如山仁義里人嘉慶間重修文廟本里應派工費如山慨捐知州椿公獎慕義堪型額

王定秀初與弟析居弟浮蕩產且盡秀復與夥居數年弟漸改行遂分己產之半與之

興國州志

卷二十二 義行

四十五

曹屏藩字明定親沒廬墓置祭產嘗倡修海螺堤義渡嘉慶癸酉年 恩賜副榜子庠生逢泰孫獻魯俱好義道光間重修海螺堤並勸近里捐助工竣而其家已罄矣曾孫曙繼志俱諸生

李寶峯捐貲建義學及青山曠港口兩處義渡復建厚嶺山涼亭每歲施茶四月

李可珍之妻舒氏捐田二石一斗五升立周急所以濟李姓十三庄鰥寡孤獨者

宋凌雲業醫好義舉捐建茶亭一所義學二所並田三石六斗收租生息爲諸義舉之資均不令子孫經手

易步瀛拔貢生道光戊申己酉歲大水道殣相望瀛傾資散粥饋
米施藥全活甚多

邢尙烈監生道光己酉歲大飢倡首勸捐買米二百石分濟族人
鄒芝開諸生咸豐癸丑粵匪竄境執芝開令辦餉開叱之遂縛見
其渠不屈命斬之有二三老輩泣請曰此翁我鄉好人貧乏多
蒙推解願代死賊怒稍釋其子營救得免

徐廷諍字子義慈口里人荆府典膳九歲失怙卽能經紀其家饒
於貲州牧下令舉大事廷諍輒居先嘗出粟助賑慮材修學獨
修州城東南二門並作城樓其上巍然爲一州鉅觀據吳明卿集增入

興國州志

卷二十二 義行

四十六

王定連字湯獻諸生性慷慨好義族里有急靡不周卹興國差徭
不均定連援郭制軍所定章程呈請遵行合邑賴之舊志列入
友今改王端字守正上遷里人性慷慨明正統間捐粟賑饑授義官補遺

義行 增補

元

劉子承字崇五興教里人性仁惠遠近稱爲長者元季紅巾賊起所過焚掠相戒勿入劉善人家以泛舟賑饑事聞於朝敕旌義門今坡山麓尙有義門坊遺蹟云

劉子善興教里人至治間黃岡畝有橋圯於水子善捐貲修復鄉里德之易名劉公橋九江范士奇撰記文採入省志具載文錄陳仲明富於貲至正十二年徐壽輝陷武昌遣僞將掠興國仲明發粟糾里中子弟立寨於顏山拒之獲保全者千家

興國州志

卷二十二 義行

四十七

明

阮應智吉口里人元末大亂智集丁壯立寨保障一方洪武歲大饑發粟以賑鄉里德之

鍾永昭宣德間歲饑出穀千餘石周給族黨活人無算勅賜義官鄭三庭上陽辛人明末流賊入境率眾力拒人賴以安

袁澄字晤之豐義里人成化甲申南京大饑助賑三次授義官坊鐫御書仍然仁風四字

鍾聲震成化元年大祲出穀助賑勅賜冠帶

郭彥連家饒裕親故匱乏者貸之不能償者焚其券成化十四年

太饑輸粟助賑旌爲義民

劉仕華字朝彥興教里人里有劉公橋劉子善所修也歲久橋圯仕華捐貲獨修費以千計遺訓子孫世修此橋今計十有一修焉

劉宗武字寶墩興教里人成化間捐穀濟飢全活甚眾事聞於朝授宗武孫珥義官

劉鐸字文振興教里人素封好施里中貧乏賴以舉火者奚啻百家歲荒施賑不一而足今裔孫繁衍咸謂善人之後必大云

朱廷烈上遷里人天啓癸未蛟水成災廷烈捐完本里錢漕今有

興國州志

卷二十二 義行

四十八

高臺九甲朱廷烈好義濟人大丈夫一里丁糧盡代納聲名萬載播 皇都之謠

阮惟魁吉口里人宏治十八年大饑捐穀千餘石助賑賜義官

阮文祿吉口里人捐金助賑勅授義官

尹友萬宏治間歲稔捐穀千餘石助賑勅賜義官

尹旦申字古泉正德間歲饑捐穀千石助賑勅賜冠帶

賈文悅字仲惠豐義里人好闢佛而能施予正德己巳歲饑輸粟助賑朝廷義之授散官嘉靖庚寅捐立碧山家廟充以祭田凡族之不能婚嫁殯葬者助以貲吳州尊獎敦義風世額

劉 錫興教里人正德間出穀賑饑授義官

劉 珽興教里人正德間出穀賑饑授義官

朱文達上遷里人洪武間出粟賑饑授義官

劉 玗興教里人成化間出粟賑饑授義官

劉 琇興教里人成化間出粟賑饑授義官

劉本端字德山崇慶里人性仁厚廛心利濟捐修橋梁不一而足如排市涿洲帥橋良薦大了山麓等處遺跡尙存子三孫十九曾元目見者七十二人年九十無疾而卒

張鑛鑠兄弟天啟元年大侵減價平糶復捐穀千餘石助賑敕授義

興國州志

卷二十二 義行

四十九

官

國朝

陳能也仁義里人里有七里冲溪廣十餘丈舊架木爲梁水漲輒漂沒能也易以石爲洞九橫亘如長虹子孫世任修葺能也名其良土人名良公橋

樂遇聖中豐樂里人順治間路拾遺金五十兩晚候道傍久之有鄰人方某來泣告以故急還之方感其義製聯以頌

舒嘉麟字振公中豐樂里人康熙三十二年大饑捐穀二百餘石助賑張州尊額贈惠人二字曾孫觀國歲貢

張任卿字又尹庠生康熙時寶政里人樂善好施州尊李公獎給
義傳千古匾今存

劉元剛字履柔興教里人郡庠生性儉約而施濟不少吝假貸者
或積歲無償券盈簏病篤命其子啟緘盡出而焚之卒之日藝
香擁門有哭于道者

王堯瑞上遷里人雍正庚戌歲荒捐粟五百石助賑魏州尊獎給
義蓋一方匾額今存

王可傳上遷里人性廉介樂善不倦曾路拾遺銀一袱立候久之
無向詢者卽在州城榜招銀主驗實悉以歸之人咸欽歎他如

興國州志

卷二十二 義行

五十

修橋造路置渡等事倡捐者不一而足

孫大戴號兩礮東鄉里人性慷慨遇善舉竭力爲之乾隆丁丑歲
荒出穀千餘石減價平糶全活一方前任靳宋兩州尊均獎以
額

陳竹軒字德新永福里人家貧醫游江南六安州界拾遺金五十
餘兩坐候久之無向訊者暮宿驛亭有布商來覓詢實還之商
酬以半不受時里人吳勳材同寓甚契之訂爲姻好晚年醫寓
漢口遇赤貧乞診者屢却謝儀壽八十一卒

馬佩玉號竹溪監生樂歲里人道光丁亥歲創興馬氏義學學正

帥承治爲之序悉心經畫多所成就州中向無義學後各里多
做行之鄉老稱善臚額於堂

俞明彰賦性明敏仗義輕財凡族黨有善事則誘掖以成其美兄
孔彰廷試拔元好遊山水不治家明彰助資以勵其志年七十
七無病卒生子七曾孫道泰武進士

張昌寶號懷三援例捐布理問銜道光辛卯壬辰州大水捐資搭
棚庇難民設廠施粥並置有義塚

孔毓博下陽辛里人重義氣不吝財族中貧乏賴以舉火者計數
十家前州尊魏公題贈義蓋一方匾額

興國州志

卷二十二 義行

五十一

阮大脚字巨明永福七里崗人幼貧嘗赤脚行大脚之名始著稍
長傭於鄰積二十餘年買田二石餘斗以二斗爲遠祖祭產歸
與妻耕敝衣蔬食歲糴餘粟得錢置產倍焉居傍有二溪行者
苦之一日出藏鋤建石礮二捐田一斗爲歲修計又捐田六斗
設義漿於橋畔行人德之

王安易字經三豐義里人敦行善事修蓮蓬山路而築亭於山腹
以憩行人族有不能殯葬者助之居恒書名言十三條以自警
馮潤字芳澤永城里人性孝友侍親疾累月不緩衣帶掇芹後
隱居授徒以朱子主敬爲宗得脩金輒以贍族中孤貧

曹獻魯號克承永城里人州西海螺隄興治通衢也屢傾圮倡會鄉里續修募捐不足賠二千金有奇里人高其義

劉載蘭興教里人仙人脚迹山由興國至武穴通衢凡十五里崎嶇險阻實艱于行蘭與儒士鄭儀亭創捐鑿通道路經年始成遂如平坦並建有涼亭一座於山腰置義產以每歲所入雇人煎茶行人便之

黃懋秉字松軒里有斷港延袤周數丈慨然解囊措金二百餘劬建石礮病涉者至今稱便

吳聲遠字 崇仁里人捐修馬家湖石橋子儒齋續修又費六

興國州志

卷二十二 義行

五十二

百餘金鄉里義之

柯長齡字林熙興瑞里人庠生同治元年鄉大饑長齡捐穀賙恤陳人聘瞽目妻乞食於外齡置酒邀集夫家勸其合巹終無嫌怨孝子柯益涵中年歿無後齡捐田並錢爲之立嗣捐白茅嶺茶亭義田數畝又洋港義學本里育嬰堂多其創捐勸成

劉 煥字遠岑興教里人國學生工書肄業鹿洞江漢受知駱蔚亭袁金谿兩山長性愷悌接人和煦里有爭力爲剖說寢其事咸豐間邢太守高魁駐州札委辦團土客各匪無所容里有脅從者被仇控遠岑輒白而活之平居好施有小坡塘埠通衢也

買舟捐田置義渡行旅便之其幼子鳳典稟案勒碑

蕭肇權字金玉修淨里人於龍港張山均捐建茶亭

蕭桂馨修淨里人母命捐修龍潭竹山莊義渡

費光業字擔農善福里人廩貢試用訓導同治間捐設桐木橋義渡費數百金

鍾松圃長樂里人家貧樂施凡鄉里義舉無不解囊勸成於七里冲建亭捐田施茶又捐修石橋費數百金

萬 福字有孚尊賢坊人居豐葉里少家貧傭資孝供節母愛撫弱弟稍長服賈家漸裕捐立祭會建字藏路燈石橋於沿埠鎮

興國州志

卷二十二 義行

五十三

阮承武吉口里人捐修本州育嬰堂授八品銜

章登梯字攀雲吉口里人候選縣丞光緒七年與弟監生章霞建義學於祖祠西館具悉備捐田五石歲收穀四百斛充脩金膏火州尊嚴公鸞昌示刊定章獎義行可風額

袁治村豐義里人好善樂施子監生宗玉遵遺命捐田二石助富川書院膏火

陳才源字達三仁義里人知醫貧病多賴診治不受值咸豐間貿遷買得浙之被擄幼童爲奴詢係獨子才源惻然卽攜童訪還其家人義之

義行 又增

明

方添晟下豐樂人明正德間出穀助餉賜義官子本仁捐修犀牛

山麓竹橋兩世好義孫麒麟鳳麟俱諸生

舊志

劉用賢字良述興教里人家素封豁達好施除夕有盜伏屋梁用賢覺呼之下盜跪乞命用賢憐其貧予十金俾改行遠近稱長者

國朝

袁良愷字西成候選州同汝雲子行己端潔鄉里重之倡修學宮

興國州志

卷二十二 義行

五十四

未竣而歿子承鈞續捐巨款克繼父志

舊志

鄭萬良上陽辛里人富而好義崇陽汪韓兩童落魄不偶良憐而食之訓誨玉成如己出汪名文盛仕至大理卿韓亦顯貴良卒汪表其墓稱猶子焉

朱志謨字公諧下豐樂人康熙間江夏有匪亂志謨率壯士隨參將曾成不避艱險護送糧舟曾嘉其勞以詩獎之

易光宙字元洪尊賢坊人鄉飲大賓乾隆乙巳捐穀助賑丙子出穀平糶知府宋公獎從善如流額

張永燦豐義里人捐貲重修帥橋又修龍堤石徑不下數百金子

天祈修袁廣山石路兩世好義後先濟美云

舒紹安字竹墅中豐樂人性嚴毅好施與乾隆五十年大饑市米
贍族鄰人趙劉構訟不已紹安解囊寢之二姓至今尸祝享年
八十有六彌留命家人焚券輾然而逝曾孫桂林諸生

程懋誠宣教里人萬年曾孫捐建仰天塘茶亭

鄭晉山上陽辛人道光己酉水災晉山收漂骸瘞而碑之市米以
賑嘗修余家坑石橋不吝巨費子首春孫東平子黃俱諸生

鄭錫侯上陽辛人性仁厚爲人解紛輒傾囊助之里邨賴以無訟
孫昌谷舉人

興國州志

卷二十二 義行

五十五

王大椿字竹坡性伉爽里邨有爭就正曲直負譽者自甘罪咎惟
恐彥方知也提倡遠近義舉不一而足壽逾八旬爲邑中者望
子鳳池編修孫世珍諸生

劉懋節字景青興教里人急公好義道光二十年捐修考棚費二
千餘金孫登雲拔貢知縣

石耿光字覲周豐葉里監生家居孝友遇善舉概捐樂成道光二
十一年大饑耿光市米分濟族邨費數百金不少吝享年八十
有二

劉謹文字熊岡宣化坊監生性仁厚有隱德捐義學祭產不下千

金嘗買一婢能言其母家夫家謹文偶至蘭谿訪得之具奩送還終不言歿後其人來謝莫不嗟歎輯有蓄德編八卷刊送子孔彰舉人

方樹蘭字香畹上遷里諸生性端方事親以孝聞捐建義莊義塾族鄙賴之

劉灼字品坡鳴盛子性謹飭好義舉捐修橋路涼亭義渡不下千金著有赤壁游草二卷醫方輯要二卷

嚴和字瑞玉辛亭里人家僅中人道光己酉大饑和典田市米助賑見鬻子者哭於道卽傾囊代贖咸豐間和施池藕任人取以

興國州志

卷二十二 義行

五十六

度荒享齡九十有一人謂積善之徵云

王清平字經傳辛亭里人居瀕江同治間攤費築堤猝不及清平典產興工家幾落當水漲時親督衆加土科頭跣足不避風雨得保無虞里人至今頌之

陳咸亨字春谷光亨弟道光庚子舉人性沈靜生平未嘗疾言遽色咸豐間粵匪突至被執咸亨徐徐曉以大義賊感而釋之旋辦接徵助餉叙功以知縣卽用善醫遠近就診全活無算酬不受亦不厭也嘗夢侍李醫聖時珍側寤而歎曰前身得非瀕湖弟子乎後至蘄州過李墓如夢其精詣神通如此

袁用霖字巨川豐義里諸生家僅中人道光己酉大饑用霖市米賑粥咸豐間辦團巡撫羅公澤南駐兵馬鞍山用霖帶團勇邏偵半邊山渡口賊不得渡獎六品銜邢太守高魁辦從賊用霖白數人寃得不死

舒守樸字詠周中豐樂監生端謹尚節操咸豐間粵匪竄州脅以僞職守樸曰賊勢如此必越境乃免遂逃居江西嘗與羅孝廉有文倡立義倉義塾至今利賴

陳振翥字晉菴下豐樂增生家不中貲歲饑輒市米鹽贍族當粵匪煽誘愚民多被蠱惑振翥誠以義方陳族無受僞職者

興國州志

卷二十二 義行

五十七

朱芳川下豐樂諸生性嚴正咸豐間賊踞省城開僞科無知年少相率赴試芳川徒跣追還曉以大義族鄙得免從逆保全甚衆闕步斗修善里人性任俠而慕金谿陸氏學家居內外整肅爲閭里式道光間崇陽民變知州祁公延步斗教習軍士武技咸豐七年粵匪竄州步斗又奉札訓練團勇州境獲安有勇知方庶乎近之

孫鰲東鄉里人監生大戴子與弟監生利國捐修橋梁義渡

全德菴字利貞吉口里人咸豐甲寅粵匪竄通山路經全村德菴被執罵賊不屈乘間得脫

成信字卓夫咸豐四年粵匪竄擾創練義勇附鄰境武甯官兵攻
勦經江西巡撫耆獎給從九品職武甯縣志列入忠義

趙連永城里人咸豐八年捐修大港石橋費數百金今稱趙保橋
黃寶齋宣化坊人創立義田捐地作義塾歲饑施穀贍族子庭舉
人孫浚供事

鄭景咸上陽辛人捐修小泉石橋費數百金行人德之孫遐箋曾
孫佑青俱諸生

徐南竹吉口里人家僅中貲鄰有楊姓以貧故數溺女一日聞楊
產女遣妻阮氏往救典裙釵飲助撫養遠近稱賢溺女之風頓

興國州志

卷二十二 義行

五十八

息

陳暉字質甫興教里廩生沈毅多略寡言笑通經能文歲饑察里
中貧戶豆區釜鍾貸如其需不濫不漏仁智兼盡莫不稱頌卒
年三十未竟其用惜哉

費攀桂字冠南中書科中書性敏博學慷慨好施道光間捐田百
畝爲族中貧子弟膏火貲子瓊枝克繼父志捐建義塾費五千
餘金

費奉萱字陶植善福里人貢生好義舉嘗捐建茶亭費數百金行
旅便之

劉廷芳性豪爽輕財好義嘗買一女奴知其有夫也憐而還之石受侯字仁一諸生家素封積穀數千石人勸其減價售受侯曰吾將有待無何歲大饑悉發賑貧全活無算越數歲又饑貧者相調曰石公得母活我乎然得一不敢望再也受侯又散穀賑之後嗣徙于河南其義聲猶嘖嘖人口云

呂明播永城里人在倪家舖驛開設茶店有客三人酣飲劇談匆匆而去遺橐銀三百兩播拾存遽追不及向晚客來尋問播出還之強酬以半播曰利若銀則不言矣固辭越月客製拾金不昧額懸店楣觀者莫不稱道

興國州志

卷二十二 義行

五十九

柯其萃字樸菴興瑞里監生慷慨好義光緒十四年歲大侵其萃遵母命兩次市米以賑閭里稱頌

李浩字大本明永樂甲午舉人考取國子監學錄居東鄉里爲人好施予遇困乏輒假貸雖久逋不責償也會試中明通榜授南

陽唐縣司訓丁內艱服闋改仕濟甯州

據興教里眠犬山浩墓碑補傳

袁本珮修善里人字崇載明宏治間捐穀賑饑賜義官

補遺

徐用癡吉口里人家貧課讀自給以妻張匱金權其息夏施茗冬施衣行二十餘年不倦